

学校的理想装备

电子图书·学校专集

校园网上的最佳资源

明词精选

 **eBOOK**
内网资料 非卖品

陶宗仪

南 浦

如此好溪山，羨云屏九叠，波影涵素。暖翠隔红尘，空明里，著我扁舟容与。高歌鼓枻，鸥边长是寻盟去。头白江南，看不了，何况几番风雨。画图依约天开，荡清晖，别有越中真趣。孤啸拓篷窗，幽情远，都在酒瓢茶具。水荇摇晚，月明一笛潮生浦。欲问渔郎无恙否？回首武陵何许。

刘 铉

蝶 恋 花

送 春

人自怜春春未去，萱草石榴，也能解春住。只道送春无送处，山花落得红成路。 高处莺啼低蝶舞，何况日长，燕子能言语。付与光阴相客主，晴云又卷西边雨。

曾允元

点绛唇

一夜东风，枕边吹散愁多少？数声啼鸟，梦转纱窗晓。来是春初，
去是春将老。长亭道，一般芳草，只有归时好。

段宏章

洞 仙 歌

茶

一庭晴雪，了东风孤注。睡起浓香占窗户。对翠蛟盘雨，白凤迎风，知谁见，愁与飞红流处。想飞琼弄玉，共驾苍烟，欲向人间挽春住。清泪满檀心，如此江山，都付与，斜阳杜宇。是曾约，梅花带香来，又自趁梨花，送春归去。

张以宁

明月生南浦

广州南汉刘 故宫铁铸圆柱犹存，周览叹息之余，夜泊三江口，梦中作一词，觉而忘之。但记二句云：“千古兴亡多少恨，总付潮回去。”因隐括为此词。

海角亭前秋草路，榕叶风清，吹散蛮烟雾。一笑英雄曾割据，痴儿却被潘郎误。宝气销沉无觅处。藓晕犹残，铁铸遗宫柱。千古兴亡知几度，海门依旧潮来去。

刘基

水龙吟

鸡鸣风雨潇潇，侧身天地无刘表。啼鹃迸泪，落花飘恨，断魂飞绕。月暗云霄，星沉烟水，角声清袅。问登楼王粲，镜中白发，今宵又添多少。极目乡关何处，渺青山髻螺低小。几回好梦，随风归去，被渠遮了。宝瑟弦僵，玉笙指冷，冥鸿天杪。但侵阶莎草，满庭绿树，不知昏晓。

千秋岁

淡烟平楚，又送王孙去。花有泪，莺无语。芭蕉心一寸，杨柳丝千缕。今夜雨定，应化作相思树。忆昔欢游处，触目成前古。良会知何许。百杯桑落酒，三叠阳关句。情未了，月明潮上迷津渚。

沁园春

万里封侯，八珍鼎食，何如故乡！奈狐狸夜啸，腥风满地，蛟螭昼舞，平陆沉江。中泽哀鸿，苞荆隼鸱，软尽平生铁石肠。凭栏看，但云霓明灭，烟草苍茫。不须踽踽凉凉，盖世功名百战场。笑扬雄寂寞，刘伶沉湎，嵇生纵诞，贺老清狂。江左夷吾，隆中诸葛，济弱扶危计甚长。桑榆外，有轻阴乍起，未是斜阳。

临江仙

街鼓无声春漏咽，不知残夜如何。玉绳历落耿银河。鹊惊穿暗树，露坠滴寒莎。梦里相逢还共说，五湖烟水渔蓑。镜中绿发渐无多。泪如霜后叶，撼撼下庭柯。

瞿 祐

摸 鱼 儿

苏堤春晓

望西湖，柳烟花雾，楼台非远非近。苏堤十里笼春晓，山色空濛难认。风渐顺，忽听得、鸣榔惊起沙鸥阵。瑶阶露润。把绣幕微褰，纱窗半启，未审甚时分。凭栏处，水影初浮日晕，游船未许开尽。卖花声里香尘起，罗帐玉人犹困。君莫问，君不见、繁华易觉光阴迅。先寻芳信。怕绿叶成阴，红英结子，留得异时恨。

高 启

沁 园 春

雁

木落时来，花发时归，年又一年。记南楼望信，夕阳帘外；西窗惊梦，夜雨灯前。写月书斜，战霜阵整，横波潇湘万里天。风吹断，见两三低去，似落箏弦。相呼共宿寒烟，想只在、芦花浅水边。恨呜呜戍角。忽催飞起，悠悠渔火，长照愁眠。陇塞间关，江湖冷落，莫恋遗粮犹在田。须高举，教弋人空慕，云海茫然。

刘 曷

浪 淘 沙

寒 食

石逢土墙斜，桃李桑麻，纸钱飞处乱啼鸦。闲趁斜阳携榼去，寒食人家。
苑树忆天涯，遗恨琵琶，铜驼衰草卧龙沙。汉寝唐陵无麦饭，暮雨梨花。

满 江 红

寄水北山人徐宗周

水北幽居，抱柴门、一溪寒玉。山万叠。青林当户，白云连谷。乳燕落
红春又晚，柴桑三径多松菊。喜新晴，布谷又催耕，秧分绿。 床头酒，
何时熟？谋诸妇，明朝漉。漫黄鸡炊黍，共邀邻曲。旧梦风云销侠气，繁华
看破知荣辱。系扁舟，罢钓晚归来，书还读。

贝 琼

水 龙 吟

春 思

楚天归雁千行，一书不寄相思苦。匆匆过了、踏青时节，更愁风雨。燕子黄昏，海棠春晓，几番凄楚。问谁能写，重重别恨，算除有，江淹赋。尚见银屏翠箔，抱琵琶夜调新谱。芳年易度，沈腰宽尽，白头如许。弱水在千，武陵一曲，重寻何处？念无情杜宇，年年此日，到淮南路。

凌云翰

蝶恋花

过雨春波浮鸭绿，草阁三间，人住清溪曲。旧种小桃多映竹，乱红遮断松间屋。有客抱琴穿翠麓，隔水呼舟，应是怜幽独。历历武陵如在目，几时同借仙源宿。

黄 澄

卖 花 声

人过天街，晓色担头红紫。满筠筐，浮浪花蕊。画帘睡醒，正眼横秋水。
听新腔，一回催起。吟红叫白，报得蜂儿知未。隔东西，余音较美。迎
门争买，早斜簪云髻。助春娇，粉香帘底。

张红桥

念 奴 娇

凤凰山下，恨声声、玉漏今宵易歇。三叠阳关歌未竟，城上栖乌催别。一缕情丝，两行清泪，渍透千重铁。重来休问尊前，已是愁绝。还忆浴罢描眉，梦回携手，踏碎花间月。漫道胸前怀豆蔻，今日总成虚设。桃叶津头，莫愁湖畔，远树云烟叠。翦烛帘幕，相思谁与说！

程立本

清 平 乐

山翁归去，记得来时路。雨涨溪泉人不渡，花外鸟啼何处？ 人间不
是山中，高怀都付丝桐。一曲瑶池宴罢，春风吹尽残红。

谢应芳

满江红

旧约寻梅，蹉跎过小春时节。陇头人至，一枝先折。喜见春风颜色好，缟衣不受缁尘涅。把十年湖海旧相知，从头说。三江上，沧洲雪；千墩下，珠林月。似许询支遁，总皆清绝。重看青山携素手，此情方解相思结。待满湖冰泮柳风轻，孤舟发。

聂大年

卜 算 子

粉泪温蛟绡，只恐郎情薄。梦到巫山第几重，酒醒灯花落。 数日尚
春寒，未把罗衣著。眉黛含颦为阿谁，但悔从前错。

临 江 仙

半道春红

记得武林门外路，雨余芳草蒙茸。杏花深巷酒旗风。紫骝嘶过处，随意
数残红。 有约玉人同载酒，夕阳归路西东。舞裙歌扇绣帘栊。昔游成一
梦，试问卖花翁。

徐有贞

玉 连 环

《临江仙》别体

心绪悠悠随碧浪，良宵空锁长亭。丁香暗结意中情。月斜门半掩，才听断钟声。耳畔盟言非草草，十年一梦堪惊。马蹄何日到神京。小桥松径密，山远路难凭。

中 秋 月

中秋月。月到中秋偏皎洁。偏皎洁。知他多少，阴晴圆缺。阴晴圆缺都休说。且喜人间好时节。好时节，愿得年年，常见中秋月。

吴 宽

采 桑 子

纤云尽卷天如水，芦荻风残，松竹霜寒，更看前溪月满山。画船红
映金尊酒，子夜歌阑，缓吹轻弹，得意人生且尽欢。

汤允勳

浣溪沙

燕垒雏空日正长，一川残雨映斜阳。鸬鹚晒翅满鱼梁。榴叶拥花当
北户，竹根抽笋出东墙。小庭孤坐懒衣裳。

马 洪

东风第一枝

梅 花

饵玉餐香，梦云惜月，花中无此清莹。俨然姑射山人，华佩明珰新整。五铢衣薄，应怯瑶台凄冷。自骖鸾，来下人间，几度雪深烟冥。孤绝处，江波流影。顛頼也，春风销粉。相思千种闲愁，声声翠禽啼醒。西湖东阁，休说当时风景。但留取，一点芳心，他日调羹翠鼎。

少 年 游

弄粉调脂，梳云掠月，次第晓妆成。鸚鵡笼边，鞦韆墙里，半晌不闻声。原来却在瑶阶下，独自踏花行。笑摘朱樱，微揜翠袖，枝上打流莺。

史 鉴

临 江 仙

赠余浩

秋水芙蓉江上饮，怜渠无限风流。红牙低按小梁州。淡云拖急雨，依约见江楼。最是采莲人似玉，相逢并著莲舟。唱歌归去水悠悠。清砧孤馆夜，明月太湖秋。

陈 铎

浣 溪 沙

波映横塘柳映桥，冷烟疏雨暗亭皋。春城风景胜江郊。花蕊暗随蜂
作蜜，溪云还伴鹤归巢。草堂新竹两三梢。

杨循吉

洞 仙 歌

题酒家壁

吴郊春满，绿草薰南陌，风弄轻帘小桥侧。瞰荒垣、浓丽几树夭桃，仿佛是、薄醉西施颜色。 酝香飘十里，更着流莺，乱织金梭向林织。天宇净繁芳，日暖蜂游，早拦住、高阳狂客。便典却、罗衫又何妨，算容易飞花，韵光难得。

顾 潜

洞 仙 歌

自 寿

娄江一碧，动鲈鱼佳兴，浩荡鸥波放烟艇。过溪桥、十里香稻垂花，秋未晚、远渚芙蓉万柄。野翁能爱我，酌酒烹鸡，何处渔歌更堪听。醉起试推篷，骤雨初收，斜阳外、山光云影。愿百岁、逍遥灑西东，任华发星星，换来青镜。

顾 璘

摸 鱼 儿

十二月十四日自衡入永

远山低半留残雪，望中清景殊绝。寒云渐逐西风散，村落午烟摇曳。行路客，被簿领沉迷，又渡隆寒节。阳回岁歇。是何日春来，早梅花尊，看透几分白。忆江左，多少关河分隔，异乡空望明月。衡阳飞雁都回矣，欲寄音书那得！情似结，更断酒抛诗，幽恨凭谁说！髯霜鬓雪。拼老去年华，禾畦麦垄，觅取旧生业。

唐 寅

一 剪 梅

雨打梨花深闭门。忘了青春，误了青春，赏心乐事共谁论。花下销魂，
月下销魂。愁聚眉峰尽日颦。千点啼痕，万点啼痕，晓看天色暮看云。
行也思君，坐也思君。

张 縯

蝶 恋 花

紫燕双飞深院静，簟枕纱厨，睡起娇如病。一线碧烟萦藻井，小鬟茶进龙香饼。拂试菱花看宝镜，玉指纤纤，撚唾撩云鬓。闲折海榴过翠径，雪猫戏扑风花影。

风 流 子

新阳上帘幌，东风转、又是一年华。正驼褐寒侵，燕钗争袅。句翻词客，簪斗宫娃。堪误处、林莺啼暖树，渚鸭睡晴沙。绣阁轻烟，剪灯时候，青旌残雪，卖酒人家。此时因重省。瑶台畔，曾遇翠盖香车。惆怅尘缘犹在，密约还赊。念鳞鸿不见，谁传芳信，潇湘人远，空采蘋花。无奈疏梅风景，碧草天涯。

陆 深

念 奴 娇

秋日怀乡用东坡韵

大江东去，是吾家、一段画笥中物。襟带五湖吞百渚，说甚黄州赤壁。两岸芦汀，一湾柳浪，海涌桥头雪。沧浪声里，渔翁也是豪杰。明年拟赋归来，轻舟短棹，两腋清风发。春水稳如天上坐，闲看浮沤兴灭。黄歇穿沙，袁崧筑垒，到处堪晞发。鲈鱼莼菜，一任江天岁月。

杨 慎

浪 淘 沙

春梦似杨花，绕遍天涯，黄莺啼过绿窗纱。惊散香云飞不去，篆缕烟斜。
油壁小香车，水渺云赊，青楼朱箔那人家。旧日罗巾今日泪，湿尽韶华。

临 江 仙

戍云南江陵别内

楚塞巴山横渡口，行人莫上江楼。征骏去棹两悠悠。相看临远水，独自上孤舟。
却羨多情沙上鸟，双飞双宿河洲。今宵明月为谁留？团团清影好，偏照别离楼。

满 江 红

梨 花

露重风香，韶华浅、玉林无叶。谁剪碎，遍地琼瑶，满园蝴蝶？娇泪一枝春带雨，粉英千片光凝雪。伴秋千影里月明中，伤离别。
花在手，肠如结；人对酒，情难说。忆故园游赏，清明时节。今日相逢滇海上，惊看烂漫开正月。更收灯庭院峭寒天，啼鹃歇。

文征明

满江红

拂拭残碑，敕飞字、依稀堪读。慨当初，倚飞何重，后来何酷！岂是功成身合死，可怜事去言难赎。最无辜、堪恨又堪悲，风波狱。岂不念，封疆蹙！岂不念，徽钦辱！念徽钦既返，此身何属。千载休谈南渡错，当时自怕中原复。笑区区、一桧亦何能，逢其欲。

鹧鸪天

秋雁

万里南来道路长，更将秋色到衡阳。江湖满地皆罾缴，何处西风有稻粱。随落日，渡清湘，晚鸦冲突不成行。相呼莫向南楼过，应有佳人恼夜凉。

陈 霆

踏 莎 行

晚 景

流水孤村，荒城古道，槎牙老木乌鸢噪。夕阳倒影射疏林，江边一带芙蓉老。风暝寒烟，天低衰草，登楼望极群峰小。欲将归信问行人，青山尽处行人少。

李 濂

柳 梢 青

修武道中

烂漫春游，人生行乐，山水夷犹。昨夜河阳，今朝修武，明日怀州。 平
日雅兴难酬，信辔去，东风紫骝，问酒花村，题诗松寺，飞梦蓬丘。

王世贞

望 江 南

都下思家

回首处，薄业太湖干。半艇春洲芦笋绿，一楼风雨杏花寒。此景放谁看？

玉 蝴 蝶

记得秋娘家住，皋桥西弄，疏柳藏鸦。翠袖初翻金缕，钩月晕红牙。启朱唇、含风桂子，唤残醉、微雨梨花。最堪夸，玉纤亲自，浓点新茶。嗟呀。颠风妒雨，落英千片，断送年华。海角山尖，不应飘向那人家。惹新愁、高楼燕子，赚人泪、芳草天涯。况浔阳，偶然江上，一曲琵琶。

于 未

清江裂石

忽见推帘起暮鸦，风逼小灯斜。又被打窗雪片，巡檐问，可压梅花。正开釭初试屠苏酒，举杯谁劝，强半惜年华。纵博得，玉过香暖，毕竟是天涯。浑一片云山，四围隐隐飞峦，带不起烟霞。驴背叹行频，垆头暂醉，料醒来孤踪，依旧尘沙。正醒醉含愁，猛听征鸿嘹亮，哀怨过谁家。

王锡爵

渔家傲

芦荻萧萧秋正晚，小舟移处沙汀浅。藕嫩鱼肥莼更软。新酒暖，妻儿列坐周船板。明月满江风似剪，夜寒添著蓑衣短。漫酌缓斟添几碗。星斗转，一声横笛青山远。

赵南星

水 龙 吟

杨花用章质甫韵

春闺忒恁愁人，已看尽落红翻坠。杨花更惨，连空映日，撩人情思。飞过高城，寻来小院，从教门闭。偶蘋风乍定，商量暂住，低飞燕，还扶起。何处疑花乱玉，几曾堪，髻簪衣缀。兰闺人倦，多愁牵梦，难成已碎。小玉声喧，晴天雪下，香阶无水。忆辽西何处，神魂荡漾，暗抛红泪。

屠 隆

清江裂石

西 湖

淼淼重湖背郭斜，永日坐蒹葭。四面青山不断，楼阁外，乱水明霞。有画船绵纓载词客，金翘杂珮，强半挟吴娃。水穷处，长林古寺，夏木绿阴遮。回首望空明，白鸥隐隐飞来，带一片轻沙。把酒问西湖，今来古往，都不管兴亡，旧恨年华。且与君，櫂扁舟，听取哀弦急筑，散发弄荷花。

汤显祖

阮郎归

不经人事意相关，牡丹亭梦残。断肠春色在眉弯，倩谁临远山？
排恨叠，怯衣单，花枝红泪弹。蜀妆晴雨画来难，高唐云影间。

好事近

帘外雨丝丝，浅恨轻愁碎滴。玉骨近来添瘦，趁相思无力。
小虫机杼隐秋窗，黯淡烟纱碧。落尽红衣池面，又西风吹急。

陈继儒

摊破浣溪沙

梓树花香月半明，棹歌归去草虫鸣。曲曲柳湾茅屋矮，挂鱼罾。笑
指吾庐何处是，一池荷叶小桥横。修竹纸窗灯火里，读书声。

卓发之

菩 萨 蛮

落 花

小玉楼前风雨急，春光一霎都狼藉。桃叶与桃根，谁家最断魂？ 尊
前回首望，昨夜花成浪。总是雨收时，月明空满枝。

雷 迅

苏 幕 遮

惜 春

柳含丝，梅破萼，报道东风，一夜穿帘幕。春光依旧人非昨。忽讶春光，
不是人情薄。花前醉，月下乐，只恐韶华，易去难留阁。明朝雨暗胭脂
落。莫怨春光，不管人消索。

魏大中

临江仙

钱塘怀古

埋没钱塘歌吹里，当年却是皇都。赵家轻掷与强胡。江山如许大，不用一钱沽。只有岳王泉下血，至今泛作西湖。可怜故事眼中无。但供侬醉后，囊句付奚奴。

钱士升

满庭芳

次东坡韵

往事千端，闲愁万斛，世情无数嵯峨。电光石火，变态阅来多。坐见新亭洒泪，空回首、麦秀兴歌。方悟得，金羈脱去，细草落平坡。桃源何处是？忙呼渔艇，往来如梭。长消受寒芦，皓月银波。更喜蘋香菱熟，驾舴艋、闲傍苍柯。何多事，草裘五月，江上好披蓑。

王 坊

一 斛 珠

落 花

翻空红雨，多随春信纷纷去。万千绿叶无情绪，连夜生新，占尽花开处。
一霎辞根无定所，伤心红粉成黄土。怜香只有莺啼树，似劝东风，略作些儿主。

郑士奇

百 字 令

自述，用东坡韵

先生拂袖，赋归来、曾见义熙人物。老去懒摇白羽扇，只爱青林石壁。坐引桐风，书研竹露，诗净峨眉雪。山中皓首，那知世上豪杰。自笑痴兴还浓，紫芝采就，高咏林间发。午后松涛翻雪乳，片缕茶烟明灭。世事如棋，臣心如水，老濯沧浪发。寒梅吹绽，一林香影明月。

徐

望 江 南

城上角，吹动薜萝烟。别意难忘灯下约，归期空向梦中传。消息杳如年。
孤馆客，今夕不成眠。万井寒砧敲夜月，数声黄叶坠秋天。人在碧云边。

孙承宗

阳 关 引

无那杨花闹，又听莺声咽。如簧细语，关情处漫饶舌。看苍苍烟外，早
是征车辙。纵风流还似张绪，不堪折。 仗剑对尊酒，歌未阙。叹风尘起，
新亭泪，中流楫。把眼前飞絮，学作鹅池雪。待四方勘定，直北迎归节。

浣 溪 沙

谁写南溟玉一湾，诸峰罗列小庭间，画屏十二斗烟鬟。 彩笔欲描风
骀荡，锦囊不贮雨潺湲。日来心事与俱闲。

施绍莘

浣溪沙

半是花声半雨声，夜分渐沥打窗棂。薄衣单枕一人听。密约不明浑
梦境，佳期多半待来生。凄凉何况是孤灯。

满庭芳

初夏

树染橙香，花燃榴火，曲池莲盖初张。槐阴半亩，引起竹床凉。门静闲
花自落，小园中、无数新篁。凭栏久，闲闲鹦鹉，摘叶戏螳螂。日长真
似岁，轻施冰簟，闲梦羲皇。正孤蝉依树，乳燕依梁。且喜黄梅过也，建兰
开，茶香。东斋晚，一壶村酒，新月上松窗。

董斯张

鹊 桥 仙

感 悟

轻暖轻寒，不晴不雨，辜负韶光九十。落花飞絮两无情，仗千尺游丝作合。涂抹东西，飘零南北，从此扁舟一叶。梦回始觉未归休，恨一点窥人明月。

范文光

浣 溪 沙

再赠梁姬文正

夙世刚修半面缘，西风吹上五湖船。秋来瘦影倍堪怜。痴想只教魂
孟浪，闲情空对影留连。相思同入药炉煎。

徐石麒

拂 霓 裳

望中原，故宫锦树障烽烟。惊坐起，凉宵梦断蒋陵前。金人倾宝露，玉女绣苔钱。问当筵，谁能醉鼓渐离弦？西台哭罢，三户里，识遗贤。欹皂帽。吹萧乞食总堪怜。英雄身未死，屠钓技常连。又何颜，许青门种瓜故侯田。

周永年

山 花 子

夏 夜

低髻拢花梦半醒，重携枕簟向闲庭。何处玉箫风送远，倚栏听。 趁
着萤光看络纬，卷开珠网放蜻蜓。不是夜长愁不寐，侯双星。

沈宜修

虞美人

立春

东风已上堤边柳，雪意还依旧。画罗綵胜学裁新，不道闲愁又送一番春。年华只是侵云鬓，花信何由问。待看双燕几时来，犹忆杏花长对月徘徊。

忆王孙

天涯随梦草青青，柳色遥遮长短亭，枝上黄鹏怨落英。远山横，不尽飞云自在行。

望江南

暮秋

河畔草，一望尽凄迷。金勒不嘶新寂寞，青袍难觅旧葳蕤。野烧又风吹。蝴蝶去，何处问归期。一架鞦韆寒月老，满庭鶗鴂故园非。空自怨凄凄。

王彦泓

满江红

眼角眉端，谁道是、便成抛散！怕向那、定情帘下，诉愁窗畔。几度卸妆垂手得，无端梦觉低声唤。猛思量，此际正天涯，啼珠溅。欲寄语，加餐饭，难嘱咐，凭鱼雁。隔云山牵挽，寸心如线。善病每逢春月卧，长愁多向花前叹。况如今，憔悴已难堪，何曾惯。

沈自徽

凤凰台上忆吹箫

阅古今名媛诗集

雾锁春风，烟埋秋月，一生心事全休。恰雨窗吊古，检点鸳俦。多少明珠珠泪，虚染就，锦笔银钩。伤情处，金环不见，玉叶空留。 抬头斜阳荒冢，原来是绮阁妆楼。怅尘缘虽破，梦境难收。说甚裁云好手，也几度惊彻鸡筹。沉吟久，知音罕嗣，若个能酬。

杨士聪

阮 郎 归

秋 雨

风吹黄叶客心惊，暗云秋雨生。青山飞霭入楼轻，漂摇连暮声。 沾
垄润，洒溪清，疏烟藏橘橙。江天千里一樽倾，萧萧白发更。

吴本泰

满江红

和王昭仪

白雁南飞，摇落尽，汉宫秋色。笳吹起、霓裳声断，绛河仙阙。翡翠巢空金殿里，鸳鸯瓦碎瑶台侧。忆春风拂槛露华浓，都销歇。 尘暗淡，灯明灭，蛩语似，支离说。怨琵琶空抱，杜鹃啼血。戍柝惊回鸡帐梦，玉容羞照龙沙月。莫悲伤环子系罗衣，君恩缺。

万寿祺

双调望江南

烟雨路，水国渐迷离。芳草遥天人去后，碧云满地雁来时。秋信竟差池！
何处问，脉脉到于今。精卫徒生沧海恨，鼈灵不断蜀山心。天宇自荆榛。

浣溪沙

遁渚西边桥户开，夜迎凉月唱歌回。一川烟草自徘徊。头白老乌新
啄屋，味长妖鸟独登台。五陵佳气梦中来。

陈子龙

浣溪沙

杨花

百尺章台撩乱飞，重重帘幕弄春晖。怜他飘泊奈他飞。淡日滚残花影下，软风吹送玉楼西。天涯心事少人知。

天仙子

古道棠梨寒恻恻，子规满路东风湿。留连好景为谁愁。归潮急，暮云碧，和雨和晴人不识。北望音书迷故国，一江春雨无消息。强将此恨问花枝。嫣红积，莺如织，依泪未弹花泪滴。

山花子

杨柳凄迷晓雾中，杏花零落五更钟。寂寞景阳宫外月，照残红。蝶化彩衣金缕尽，虫衔画粉玉楼空。惟有无情双燕子，舞东风。

桃园忆故人

小楼极望连平楚，帘卷一帆南浦。试问晚风吹去，狼藉春何处？相思此路无人数，毕竟天涯几许。莫听娇莺私语，怨尽梨花雨。

点绛唇

春日风雨有感

满眼韶华，东风惯是吹红去。几番烟雾，只有花难护。梦里相思，故国王孙路。春无主！杜鹃啼处，泪染胭脂雨。

少年游

春情

满庭清露浸花明，携手月中行。玉枕寒深，冰绡香浅，无计与多情。奈他先滴离时泪，禁得梦难成。半晌欢娱，几分憔悴，重叠到三更。

蝶恋花

春日

雨外黄昏花外晓，催得流年有恨何时了。燕子乍来春渐老，乱红相对愁

眉扫。 午梦阑珊归路杳，醒后思量，踏遍闲庭草。几度东风人意恼，深深院落芳心小。

唐 多 令

寒 食

碧草带芳林，寒塘涨水深，五更风雨断遥岑。雨下飞花花上泪，吹不去，两难禁。 双缕绣盘金，平沙油壁侵，宫人斜外柳阴阴。回首西陵松柏路，断肠也，结同心。

念 奴 娇

春雪咏兰

问天何意，到春深、千里龙山飞雪。解珮凌波人不见，漫说蕊珠宫阙。楚殿烟微，湘潭月冷，料得都攀折。嫣然幽谷，只愁又听啼鴂。 当日九畹光风，数茎轻露，纤手分花叶。曾有多情怀袖里，一缕同心千结。玉腕香消，云鬟雾掩，空赠金跳脱。洛滨江上，寻芳再望佳节。

夏允彝

千秋岁引

丽 谯

泽国微茫，海滨寥廓，万堞孤城逼天角。云外龙车碧树悬，霜前雁字当窗落。苕城花，秦山月，都萧索。刺史风流携琴鹤，暇日高吟倚轩阁，酾酒新亭几忘却。三柳沙明绕郡楼，九峰岚翠扶城郭。铜壶响，晓更催，宛如昨。

来集之

玉 楼 春

窗外松篁初过雨，半天爽气开烟雾。狂怀无计奈花飞，倚楼独自和莺语。
偏是春来无意绪，只身没有安排处。溪流一派送愁来，山围四面裹愁住。

黄周星

满庭芳

送友人还会稽

新绿方浓，残红尽落，多情正自凝眸。不堪南浦，又复送归舟。便倩江郎作赋，也难写、别恨离愁。消魂久，斜阳芳草，天际水悠悠。问君何处去，若耶溪畔，宛委山头。有千岩竞秀，万壑争流。愧有江湖迹遍，一如今、仍坐书囚。迟君至，开襟散发，咏月醉南楼。

金俊明

生 查 子

北平驿秋夜

暝转深林，瑟瑟松涛沸。日落旅魂惊，嘶马停还未。 灯萦独夜情，
剑吼清秋气。凉月照无眠，应见征人泪。

方以智

忆 秦 娥

花似雪，东风夜扫苏堤月。苏堤月，香销南国，几回圆缺。
上潮歌歇，江边杨柳谁攀折？谁攀折，西陵渡口，古今离别。 钱塘江

吕福生

多 丽

夜未央，蛩声一片侵床。漏滴沥，云颓雨咽，谱成半枕凄凉。空怅望，纤林带月，不堪闻，孤雁啼霜。灯泪红残，香心字冷，难将樽酒倩疏狂。恨人去，天涯路远，抛却好春光。向只道，相思有梦，毕竟荒唐。 破愁烦，蝇头绣句，花笺印叠鸳鸯。更关情，楼西倚闷，最消魂，灯下凝妆。月不长圆，花原易落，一时也抵百年长。终凝恋，斜阳衰草，别袂共离觞。一点点，鲛衫欲湿，界破檀黄。

朱一是

二郎神

登燕子矶秋眺

岷峨万里，见渺渺、水流东去。指远近关山，参差宫阙，起灭长空烟雾。南望沧溟天边影，辨不出、微茫尽处。叹三楚英雄，六朝王霸，消沉无数。从古，长江天堑，飞艎难渡。自玉树歌残，金莲舞罢，倏忽飞鸟走兔。燕子堂前，凤凰台畔，冷落丹枫白露。但坐看，狎鸥随浪，渔父扁舟朝暮。

吴

满江红

斗大江山，经几度，兴亡事业。瞥眼处，英雄成败，底须重说。香水锦帆歌舞罢，虎丘鹤市精灵歇。尚翻来，吴越旧春秋，伤心切。伍胥耻，荆城雪，申胥恨，秦庭咽。羞比肩种蠡，一时人杰。花月烟横西子黛，鱼龙沫 鸱夷血。到而今，薪胆向谁论，冲冠发。

吴闻礼

浪 淘 沙

水 宿

枕畔水泠泠，并作秋声，布衾初拥别愁生。风露自寒天自远，梦隔江城。
篷底漏疏星，何处渔灯，桐江钓后一裘轻。宦海不如归去稳，烟渚芦汀。

张 逸

桂 枝 香

寄友村居

天高气肃，正一派秋声，悲吟万木。潇洒远山抹翠，澄溪漾玉。故人家住残阳处，小枫村，低低茅屋。烟生芦渚，霜霏菊圃，酒香茶熟。疏篱畔，山中野服。想竹栏琴韵，松窗棋局。四壁清幽，闲挂云林几幅。鲤鱼风起天横雁。待一叶、寻他剡曲。开樽长啸，池边蟹紫，墙头橘绿。

程 颢

玉 楼 春

子规啼遍杨花路，
緘泪函情无寄处。
君如南浦往来潮，
妾似西陵朝暮雨。
当年只恨传金缕，
何必相逢成别苦。
夜深蜀国十三絃，
紫女青皇私自语。

胡 介

满 江 红

走马归来，西陵下、斜阳满树。回首处、酒垆犹在，河山非故。久客不知家远近，重来却怪人惊顾。听啼鹃也道不如归，归何处？ 草元阁，兰台署，扬州梦，秦淮渡。走人间未遍，苍凉日暮。惆怅辽东丁令鹤，当年华表谁为主？但相逢莫负故人心，三生路。

邵梅芳

眼 儿 媚

咏 燕

东风一剪过池塘，曾识旧纱窗。乌衣未改，红妆如昨，稳上雕梁。 年
年花下相逢处，何事更商量？多应是诉，来时春短，别后秋长。

邵 麟

贺 新 郎

雁 声

睡觉秋窗罅。正闲阶，商飊萧飒，明蟾低亚。嘹唳数声天际响，直透茆檐竹瓦。这凄怨、凭谁堪话？辛苦塞垣千万里，又明星几点汀烟挂。稻梁好，究须怕娟娟凉露横空洒。好似听、哀弦密拍，楚歌悲咤。难比闲鸥和野鹭，随意鲈乡蟹舍。任沙觜，沿缘上下。今夜重帏寒信紧，又豆棚络纬萧萧者。铜仙泪，泫然泻。

钱光绣

临江仙

酒国投时辄醉，砚田荒久慵耕，不堪落叶两三声。病从秋后减，愁向雨
中生。 拊剑还歌白石，焚香闲展黄庭，徘徊山寺又钟鸣。鸦啼归晓树，
蛩语伴疏灯。

姜实节

临江仙

纪游

梦断罗帏春浅，小楼风竹频敲。溪流一曲抹山腰。雨香初拂柳，日气渐烘桃。笑解金龟同买醉。故人雅集今宵，阍诗量酒兴还饶。晓钟齐女墓，残月大姑桥。

陆嘉淑

汉 宫 春

客中九日

极目平芜，见疏林萧飒，远水弥漫。举头一声哀雁，别泪空弹。秋客惨淡，但心伤、行路艰难。何况是，重阳时节，天涯风景凄然。长恨征途憔悴，叹敝裘风雨，疲马关山。为问故园黄菊，知有谁看。风吹破帽，漫凭高、一醉尊前。浑未解，远游何意，白云回首江天。

孙绍祖

谒金门

春雨足，香嫩枝头微绿。渭水清清寒漱玉，客来茶正熟。午倦不堪
重读，点就乳花飞瀑。七碗可人凉气肃，潇潇风助竹。

倪 抚

菩 萨 蛮

送 春

年年白放春归去，无端又是风和雨。倦态不成妆，春宵恨转长。 —
灯红夜午，城上闻更鼓。鱼鑰锁双扉，愁他梦里归。

沈士鑛

鵲 橋 仙

漁 父

澄潭集网，寒江垂线，雪白鲈鱼成串。西风吹送酒花香，促步向垆头索换。竹篙枕月，蓑衣遮面，一曲沧浪天半。乾坤水上最清闲，也自分烟波占断。

沈钟鹤

虞美人

春雨

春光九十谁分取，断送晨昏雨。桃花和泪湿胭脂，检点残花一半未开时。
长空拟把愁云扫，如梦浑难晓。柔肠不断却回环，咫尺相思人隔万重山。

天随子

南 乡 子

华亭吊古

风雨满长亭，鹤唳滩头梦未平。故国王孙何处去？伤情，烟月空濛白苧城。往事恨飘零，江上青山云自横。闻说莼鲈秋更好，凄清，漫忆风流张步兵。

今 释

八声甘州

留别阿字无兄

叹离情一往一重来，可似海门潮？已千秋期许，十年建立，两地忧劳。又道如形伴影，彼此不容招。底事扁舟上，回首迢迢。待向梅关此去，倩宾鸿寄语，云阔天高。想闻声欲下，转眼失鹪鹩。更有时，连床续梦，怕冰霜折断岁寒梢。晨钟起，添些风雨，相助萧萧。

小 重 山

得程周量民部诗却寄

落落寒云晓不流，是谁能寄语，竹窗幽。远怀如画一天秋。钟徐歇，独自倚层楼。点点鬓霜稠。十年山水梦，未全收。相期人在别峰头。闲鸥鹭，烟雨又扁舟。

满 江 红

大风泊黄巢矶下

激浪输风，偏绝分，乘风破浪。滩声战，冰霜竟冷，雷霆失壮。鹿角狼头休地险，龙蟠虎踞无天相。问何人唤汝作黄巢，真还谤？雨欲退，云不放。海欲进，江不让。早堆垓一笑，万机俱丧。老去已忘行止计，病来莫算安危帐。是铁衣著尽著僧衣，堪相傍。

水调歌头

忆螺岩霁色

好雨正重九，不上海山门。螺岩却忆绝顶，霁色满乾坤。少得白衣一个，赢得翠环千叠，罗立似儿孙。独坐可忘老，何用更称尊。龙山会，南徐戏，共谁论。古今画里，且道还有几人存？便佛六铢石尽，重见四空天堕，此处不交痕。远水吞碧落，斜月吐黄昏。

归 庄

锦 堂 春

燕子矶

半壁横江矗起，一舟载雨孤行。凭空怒浪兼天涌，不尽六朝声。 隔
岸荒云远断，绕矶小树微明。旧时燕子还飞否？今古不胜情。

叶小鸾

南 歌 子

秋 夜

门掩瑶琴静，窗消画卷闲。半庭竿雾绕阑干，一带淡烟红树隔楼看。
云散青天瘦，风来翠袖寒。嫦娥眉又小檀弯，照得满阶花影只难攀。

浣 溪 沙

曲曲阑干绕树遮，半庭花影带帘斜。又看暝色入窗纱。楼外远山横
宝髻，天边明月伴菱花。空教芳草怨年华。

呼 举

玉 楼 春

夜 坐

一灯半灭愁无数，河畔清蟾凉印户。闲庭细草乱蛩鸣，似共离人分泣露。
玉楼遥隔湘江浦，黯黯离魂寻得去。秋钟夜半远随风，短梦惊回忘去路。

郑如英

临江仙

芙蓉亭怀郑奇逢

夜半忽惊风雨骤，晓来寒透衾裯。萧条景色懒登楼。衡阳归雁杳，幽恨上眉头。 台空院废人依旧，月沉云淡花羞。芙蓉寂寞小亭秋。黄花伤晚落，相对倍添愁。

张倩倩

蝶 恋 花

丙寅寒夜与宛君话君庸作

漠漠轻阴笼竹院，细雨无情，润湿桃花面。落叶西风吹不断，长沟流尽
残红片。千遍相思才夜半，又听楼前，叫过伤心雁。不恨天涯人去远，
三生缘薄吹箫伴。

陆 钰

曲 游 春

和查伊璜客珠江元韵

问牡丹开未？正乳燕身轻，雏莺声细。共听霓裳，看为云为雨，胡天胡帝。与君行乐处，经回首，依稀都记。携来丝竹东山，几度尊前杖底。鼙鼓东南动地。见下濂楼船，旗旗无际。未免关情，对楚岭春风，吴江秋水，暗洒英雄泪。更莫问，年来心事。又是午梦惊残，歌声乍起。

柳如是

梦江南

其一

人去也，人去鹭鸶洲。菡萏结为翡翠恨，柳丝飞上钿筝愁。罗幕早惊秋。

其二

人去也，人去梦偏多。忆昔见时多不语，而今偷悔更生疏，梦里自欢娱。

其三

人何在？人在枕函边。只有被头无限泪，一时偷拭又须牵。好否要他怜。

王夫之

摸 鱼 儿

东洲桃浪

剪中流，白蘋芳草，燕尾江分南浦。盈盈待学春花靥，人面年年如故。留春住，笑几许，浮萍旧梦迷残絮。棠桡无数。尽泛月莲舒，留仙裙在，载取春归去。佳丽地，仙院迢迢烟雾。湿香飞上丹户。醮坛珠斗疏灯映。共作一天花雨。君莫诉。君不见、桃根已失江南渡。风狂雨妒，便万点落英，几湾流水，不是避秦路。

更 漏 子

本 意

斜月横，疏星炯，不道秋宵真永。声缓缓，滴冷冷，双眸未易扃。霜叶坠，幽虫絮，薄酒何曾得醉。天下事，少年心，分明点点深。

玉 楼 春

白 莲

娟娟片月涵秋影，低照银塘光不定。绿云冉冉粉初匀，玉露泠泠香自省。荻花风起秋波冷，独拥檀心窥晓镜。他时欲与问归魂，水碧天空秋夜永。

蝶 恋 花

衰 柳

为问西风因底怨，百转千回，直要情丝断。叶叶飘零都不管，回塘早似天涯远。阵阵寒鸦影飞乱，总趁斜阳，谁肯还留恋。梦里鹅黄拖锦线，春光难借寒蝉唤。

蝶 恋 花

君山浮黛

湘光极目，至君山始见一片青芙蓉浮玻璃影上。自此出洞庭与江水合。谢眺作云：“大江流日夜，客心悲未央”者，于焉是矣。湖南清绝，亦于此竟焉。

渺渺扁舟天一瞬，极目空清，只觉云根近。片影参差浮复隐，琉璃净挂青螺印。忆自嬴皇相借问，尧女含颦，兰珮悲荒磷。泪竹千竿垂紫晕，

宾鸿不寄苍梧信。

惜余春慢

本意

似惜花娇，如怜柳懒，前月峭寒深护。从今追数，雨雨风风，总是被他轻误。便与挥手东风，闲愁抛向，绿阴深处。也应念，曲岸数枝杨柳，不禁飞絮。争遣不烧烛留欢，暗邀花住？坐待啼莺催曙。怕燕子归来，定巢栖稳，不解商量细语。未拟攀留长久，乍雨乍晴，由来无据。待荷珠露满，梅丸黄熟，任伊归去。

绮罗香

读《邵康节遗事》：属纻之际，闻户外人语，惊问：“所语云何？”且云：“我道复了幽州。”声息如丝，俄顷逝矣。有感而作。流水平桥，一声杜宇，早怕洛阳春暮。杨柳梧桐，旧梦了无寻处。拼午醉、日转花梢，甚夜阑，风吹芳树。到更残，月落西风，冷然蝴蝶忘归路。关心一丝别挂，欲挽银河水，仙槎遥渡。万里闲愁，长怨迷离烟雾。任老眼，月窟寻幽，更无人，花前低诉。君知否，雁字云沉，难写伤心句。

青玉案

忆旧

桃花春水湘江渡，纵一艇，迢迢去。落日赭光摇远浦。风中飞絮，云边归雁，尽指天涯路。故人知我年华暮，唱彻灞陵回首句。花落风狂春不住。如今更老，佳期逾杳，谁倩啼鹃诉。

彭孙贻

西 河

金陵怀古次美成韵

龙虎地，繁华六代犹记。红衣落尽，只洲前，一双鹭起，秦淮日夜向东流，澄江如练无际。白门外，枯槎倚，楼船朽榭难系。石头城坏，有燕子衔泥故垒。倡家犹唱后庭花，清商子夜流水。卖花声过春满市。闹红楼，烟月千里。春色岂关人世。野棠无主，流莺成对，街入临春故宫里。

满 江 红

曾侍昭阳，回眸处六宫无色。惊鼙鼓，渔阳尘起，琼花离阙。行在猿啼铃断续，深宫燕去风翻侧。只钱塘早晚两来潮，无休歇。天子气，宫云灭。天宝事，宫娥说。恨当时不饮，月氏王血。宁坠绿珠楼下井，休看青冢原头月。愿思归望帝早南还，刀环缺。

余 怀

念 奴 娇

和苏子瞻

狂奴故态，卧东山，白眼看他世上。老子一生贫彻骨，不学黔娄模样。醉倒金尊，笑呼银汉，自命风骚将。楼高百尺，峨嵋地作屏障。追想五十年前，文章意气，尽淋漓悲壮。一自金驼辞汉后，曾共楚囚相向。司马青衫，内家红袖，此地空惆怅。花奴打鼓，声声唤醒瑜亮。

沁 园 春

和刘后村

老去悲秋，菊蕊盈头，竹叶盈杯，正洞庭木落，宫莺乍别；楚天云净，旅雁初回。天许闲人，人寻韵事，高筑栽花十丈台。催租吏，纵咆哮如虎，如我何哉。东篱更葺茅斋。邨架上藏书万卷堆。叹年将半百，须髯如戟，运逢百六，心事成灰。莫话封侯，休言献策，只劝先生归去来。平生恨，恨相如太白，未是奇才。

沈 谦

满 江 红

咏 柳

一剪莺梭，早织就，千丝万缕。最苦是，苏堤欲晓，灞桥将暮。媚眼未醒开又合，纤腰半倚扶难住。又沉沉搭在玉阑干，和烟雨。还记得，长亭路，曾折送，行人去。恁牵缠似我，别时情绪。帘黑梦回应有泪，楼高目断浑无语。隔青山不见紫骝归，蒙天絮。

张煌言

满江红

怀岳忠武

屈指兴亡，恨南北黄图消歇。便几个孤忠大义，冰清玉烈。赵信城边羌笛雨，李陵台上胡笳月。惨模糊吹出玉关情，声凄切。 汉宫露，染园雪。双龙逝。一鸿灭。剩逋臣怒击，唾壶皆缺。豪杰气吞白凤髓，高怀眦饮黄羊血。试排云待把捧日心，诉金阙。

长相思

秋

秋山青，秋水明。午梦惊秋醒未醒，乾坤一草亭。 故国盟，故园情。夜阑斜月透疏棂，孤鸿三两声。

夏完淳

一 剪 梅

柳

无限伤心夕照中，故国凄凉，剩粉余红。金沟御水日西东。昨岁陈宫，今岁隋宫。往事思量一饷空，飞絮无情，依旧烟笼。长条短叶翠濛濛。才过西风，又过东风。

婆罗门引

春尽夜

晚鸦飞去，一枝花影送黄昏。春归不阻重门。辞却江南三月，何处梦堪温。更阶前新绿，空锁芳尘。随风摇曳云，不须兰棹朱轮。只有梧桐枝上，留得三分。多情皓魄，怕明宵还照旧钗痕。登楼望，柳外销魂。

两 同 心

有 梦

梦到扬州，依然南浦。绮罗如梦锦如尘，香车宝马知何处。翠烟宠，十里隋堤，茫茫飞絮。举目魂消肠断，春光如许。琼花消息竟飘零，荒台古苑春无主。想莺花，十二楼前，迷离烟雨。

寻 芳 草

别 恨

几阵杜鹃啼，却在那，杏花深处。小禽儿，唤得人归去，唤不得愁归去。离别又春深，最恨也，多情飞絮。恨柳丝，系得离愁住，系不得离人住。

沈 泓

江 城 子

村 居

长堤细柳隐虹桥，弄笙箫，伴渔樵。醉倚枫林，仰面挂诗飘。释卷正逢
秋水涨，临古渡，放轻舠。夕阳西下暗窗绡，雁声高，笛声遥。碧簟凉
生，细雨燕辞巢。隔岸篝灯孤艇泊，沽浊酒，短扉敲。

屈大均

紫萸香慢

送 雁

恨沙蓬，偏随人转，更怜雾柳难青。问征鸿南向，几时暖返龙庭。正有无边烟雪，与鲜飏千里，送度长城。向并门少待，白首牧羝人，正海上，手携李卿。秋声，宿定还惊。愁里月，不分明。又哀笳四起，衣砧断续，终夜伤情。跨羊小儿争射，恁能到，白蘋汀。尽长天遍排人字，逆风飞去，毛羽随处飘零，书寄未成。

长 亭 怨

与李天生冬夜宿雁门关作

记烧烛、雁门高处。积雪封城，冻云迷路。添尽香煤，紫貂相拥、夜深语。苦寒如许，难和尔、凄凉句。一片望乡愁，饮不醉，垆头驼乳。无处，问长城旧主，但见武灵遗墓。沙飞似箭，乱穿向，草中狐兔。那能使、口北关南、更重作，并州门户。且莫吊沙场，收拾秦弓归去。

浣 溪 沙

杜 鹃

血洒青山尽作花，花残人影未还家。声声只是为天涯。有恨朱楼当凤阙，无穷青冢在龙沙。催还不得恨琵琶。

念 奴 娇

秣陵吊古

萧条如此，更何须，苦忆江南佳丽。花柳何曾迷六代，只为春光能醉。玉笛风朝，金笳霜夕，吹得天憔悴。秦淮波浅，忍含如许清泪。任尔燕子无情，飞归旧国，又怎忘兴替。虎踞龙蟠那得久，莫又苍苍王气。灵谷梅花，蒋山松树，未识何年岁。石人犹在，问君多少能记。

